

Euskal AEko enpresen % 18,2 berritzaileak izan ziren 2019an, eta kopurua % 30,8ra iritsi zen 10 enplegatu eta gehiagokoetan


Jarduera berritzaileetako guztizko gastua % 2,4 hazi da, 2.895 milioi eurora iritsita

2019an 10 enplegatu edo gehiagoko enpresa berritzaileen ehunekoa % 30,8ra iritsi da Euskal AEn, aurreko urtean baino 0,7 puntu gehiago, Eustaten datuen arabera. Aztertutako bi berrikuntza-motei so eginez gero, Produktuko berrikuntza % 21,3k egiten dute, eta Prozesuko berrikuntza % 27,3k. Espainian, 10 enplegatu edo gehiagoko enpresa berritzaileen ehunekoa % 20,8koa da, Euskal AEn baino ehuneko 10 puntu txikiagoa.

Enpresa guztiak kontuan hartuta, Euskal AEn enpresa berritzaileak % 18,2 izan ziren 2019an, 2018an baino 0,9 puntu gehiago. % 10,3 Produktuko berrikuntzan eta % 15,8 Prozesuko berrikuntzan.

Euskal AEko enpresek berrikuntza-jardueretan egindako gastuak 2.895 milioi euro izan ziren 2019an, % 2,4ko hazkundearekin. Jarduera horietan, barneko I+Gko gastua % 51,2 da, I+Gko Erosketa (kanpoko I+G) % 15,3 eta Bestelako berrikuntza-jarduerak (*) gainerako % 33,5a.

Jarduera berritzaileetako gastuaren banaketa jardueren arabera (%). 2019



Iturria: Eustat. Berrikuntzaren inkesta

Enpresa berritzaileen % 25,9k finantzaketa publikoa jasotzen dute berrikuntza-jardueretarako

Enpresa berritzaileek finantzaketa publikoko laguntzak jaso ditzakete berrikuntza-jardueretarako erakunde publiko baten edo gehiagoren aldetik. Hala, enpresa horien % 25,9k mota horretako finantzaketa publikoa jaso zuten. Jatorria aztertuz gero, Eusko Jaurlaritzatik datozenak nabarmentzen dira, enpresa berritzaile guztien % 17,3ra baitoaz. Foru-aldundiek eta toki-administrazioek enpresa horien % 9,3 eta % 6,1 finantzatzen dituzte, hurrenez hurren. Estatuko Administrazioak Euskal AEko enpresa berritzaileen % 6,1 laguntzen ditu; aldiz, enpresen % 4,2k Europar Batasunaren finantzaketa jasotzen dute Horizon 2020 programaren bidez, eta % 2,7k EBren beste finantzaketa baten bidez.

10 enplegatu edo gehiagokoen kasuan, % 53,5ek laguntza publikoak jasotzen dituzte, eta berrikuntza-jardueretan gastuak dituzten tamaina horretako enpresen kopuru handiena, zehazki % 41,8, Eusko Jaurlaritzak ere finantzatzen du. Foru-aldundiek eta toki-administrazioek % 23,0 eta % 9,5 finantzatzen dituzte, hurrenez hurren, eta Estatuko Administrazioak 10 enplegatu eta gehiagoko enpresen % 19,8 finantzatzen ditu. Bestalde, Europar Batasunak Horizon 2020 programaren bidez % 10,2 finantzatzen ditu, eta, beste finantzaketa-mota baten bidez, % 7,7.

Berrikuntza-jardueretarako finantzaketa publikoa jasotzen duten enpresa berritzaileak, jatorriaren arabera (%). 2017-2019

Unitatea: enpresa portzentajea

	Guztira	10 langile edo gehiago
Finantzaketa publikoajasotzen dute hauetatik (*)	25,9	53,5
Eusko Jaurlaritza	17,3	41,8
Foru aldundiak	9,3	23,0
Tokiko administrazioak	6,1	9,5
Administrazio zentrala	6,1	19,8
del Programa Horizonte 2020 de la UE	4,2	10,2
otra financiación de la UE	2,7	7,7

(*) Enpresek erakunde baten baino gehiagoren finantzaketa jaso dezakete

Iturria: Eustat. Berrikuntzaren inkesta

Enpresen erdiek baino gehixeagok, % 55,8k, uste dute badirela jarduera berritzaileak egitea eragozten duten faktoreak

Enpresen % 55,8k uste dute berrikuntza zailtzen duten faktore jakin batzuk daudela. Faktore horien artean honako hauek daude: "Enpresaren barruan beste lehentasun batzuk daude", % 42,4k; "Kostu handiegia", % 34,8k; "Lehia gehiegi dago merkatuan", % 28,2k; "Ziurgabetasuna ideia horien merkatuko eskariari dagokionez", % 27,1ek; "Laguntza edo diru-laguntza publikoak lortzeko zailtasunak", % 26,1ek; eta "Enpresaren barruko finantzaketarik eza" edo "Kanpoko iturri pribatuen finantzaketarik eza", % 24,1ek.

10 enplegatu edo gehiagoko enpresetan, jarduera berritzaileak egitea zailtzen duten faktoreak daudela uste dutenen ehunekoa % 64,1era igotzen da, eta aurreko eragozpen berak nabarmentzen dira.

Produktu berritzaileek beren enpresetako negozio-zifraren % 38,9 sortzen dute

Produktuko berrikuntza duten enpresetan, negozio-zifra osoaren % 38,9 produktu berritzaileetatik dator; aldatu gabeko produktuak edo pixka bat aldatutakoak, berriz, gainerako % 61,1a dira.

10 enplegatu edo gehiagoko enpresetan ehuneko horiek zertxobait aldatzen dira, eta kasu horretan % 38,0koa da produktu berriek edo nabariki hobetuek negozio-zifraren gainean duten batez besteko eragina.

Ohar metodologikoa

2018tik aurrerako Berrikuntzaren Inkesta 2018ko Osloko Eskuliburuaren bertsio berriarekin egiten da. Horrek dakar ezen urte horretatik aurrera seriea hautsi egin dela metodologia-aldaketaren ondorioz. Horregatik, 2018an eta 2019an argitaratutako datuak ezin dira alderatu aurreko urteetan argitaratutakoekin.

(*) Bestelako berrikuntza-jarduerak: berritzeko asmoz egin daitezkeen enpresaren jarduerak jasotzen ditu, sei kategoria hauetan:

1. Ingeniaritza, diseinua eta sormenezko beste jarduera batzuk.
2. Marketina eta marka sortzea.
3. Jabetza intelektualaren eskubideekin lotutako jarduerak.
4. Langileen prestakuntzarekin lotutako jarduerak.
5. Softwarea garatzea eta datu-baseen lanarekin lotutako jarduerak.
6. Ondasun ukigarriak eskuratzearekin edo alokatzearekin lotutako jarduerak.

Oharra: Eustatek eskerrak eman nahi dizkie estatistika hau egiten lagundu duten enpresa eta erakunde guztiei, zirkunstantziak gorabehera egindako ahaleginagatik. Haien laguntzarik gabe, ez litzateke posible izan.

Informazio gehiagorako:

Eustat - Euskal Estatistika Erakundea / Instituto Vasco de Estadística
Donostia-San Sebastián, 1 01010 Vitoria-Gasteiz
Prensa-zerbitzua: servicioprensa@eustat.eus Tlf: 945 01 75 62